



Baengzyoux Ndei Yiengzlwg

小羊的好朋友

Yiengzlwg unqswnh, caeuq bouxwnq doxhuz, bouxlawz cungj haengj caeuq de guhcaemz, ndigah, de miz haujlai baengzyoux ndei. Duzvaiz, duzmax, duzlawz, duzmou, duzdouq cungj dwg baengzyoux ndei de, ngoenzngoenz cungj caeuq de guhdoh guhcaemz guh'angq.

Ngoenzneix vaiqhaemh, dienheiq haemq ndei, ndit byaiz rumzfifi, gingj haemh gyaundeix raixcaix. Yiengzlwg angq dangqmaz, gag byaij ok dou, bae gwnz bya guhcaemz.

Yiengzlwg cingq angqyangz nyouqnyouq hoengheiq singsien sangswt, dingqdingq roeg swenj dided, cimcim va'ndoi lengili homfw. Sawqmwh, daj ndaw caz faexnyaengq ndonj ok duz manaez ndeu. Manaez riunyaen naeuz: "Hwhw, gizneix miz duz yiengzlwg bizbwd ndeu, haengj-dingh ndeigwn raixcaix!" Manaez doq gangj doq coemj coh yiengzlwg, yaek gwn yiengzlwg. Yiengzlwg doeksat-

yat, fwt dawz doiq gau haengqrengz bae dingj, hemq gyoengq baengzyoux daeuj gouq swheij.

Duzvaiz cingq youq henzgyawj gwn nywj, fwt dingqny yiengzlwg hemq gouqmingh, de ngiengx gyauej daj geh cazfaex baez yawj, raen dwg duz manaez hung ndeu. De naemj: "Duz manaez neix youh hung youh ak, caemhcaiq lau lij miz gyoengq manaez dem, gou baenzlawz buek ndaej gvaq ne." Naemj dwk sikhaek buetdeuz lo.

Duzmax hix youq gwnz bya, de dingqny sing hemq, ngaemgyauej baez yawj, raen dwg duz manaez ndeu, hix riengjret buetdeuz lo.

Duzlawz cingq yaek roengz bya baema, fwt dingqny yiengzlwg hemq, de sup dingz yamqdin roengzdauej ngeux gyauej yawj, raen dwg duz manaez ndeu, de caegcaeg ndonj roengz bya baema lo.

Duzmou daj dinbya ginggvaq, fwt dingqny yiengzlwg hemq, de yawjraen dwg duz manaez, bulu cung roengz bya ma ranz lo.

Duzdouq cingq youq dinbya gwn nywj, baez dingqny sing hemq, gijmaz cungj mbouj goq, lumj naq nei yatdiuq baema lo.

Duzma daj ndaw ranz okdaeuj,

ngamq daengz dinbya couh dingqny yiengzlwg hemq gouqmingh, gijmaz hix mbouj naemj, gipmuengz cung hwnj bya bae. Cij raen de daj ndaw cazhaz lumj byajmig nei cung okdaeuj, gaemz ndeu couh haeb dawz hoz duz manaez. Manaez in ndaej cakndaundau, hoeng cix swenj mbouj ndaej saek sing okdaeuj. Manaez roxnyinh baezneix bungz daengz duzak lo, yaek dai lo, de mbouj gamj caiq cak saekdi. Duzma baegfofo haengqrengz gaeb dawz hoz manaez, baez soeng bak vuenh heiq, manaez couh swngzgei buetdeuz lo.

Yiengzlwg dauq daengz ranz lo, gyoengq baengzyoux ndei de cungj daeuj lo.

Duzvaiz sing goksak naeuz: Mwnz baenzlawz mbouj lwnh gou nyi ha? Doiq gau gou hunghaeng soemset raehrumrum, cijaeu gou baez gau, couh gau ndaej saej manaez okdaeuj.

Duzmax daemhdaemh din naeuz: Mwnz baenzlawz mbouj lwnh gou nyi ha? Gij daez gou gengget miz rengz, cijaeu gou yaengx daez baez dik, couh dik manaez gyauej dek bae.

Duzlawz hozndat maenj sing ndeu, naeuz: Mwnz baenzlawz mbouj lwnh gou nyi ha? Gou singmaenj ak,

cijaeu gou baez maenj, couh hwk manaez mbei dek bae.

Duzmou fanfan bakmbwnj na de, naeuz: Mwnz baenzlawz mbouj lwnh gou nyi ha? Yawjyawj gij bakmbwnj gou——Cijaeu gou yungh bak baez gud, couh gud manaez roux roengz bya bae.

Duzdouq ndiengqndiengq din, riu coh yiengzlwg naeuz: Mwnz baenzlawz mbouj lwnh gou nyi ha? Gou yienznaeuz rengz iq, hoeng, gou buet ndaej vaiq, ndaej bang mwnz soengq saenq ra vunz daeuj gouq mwnz ha.

Daihgya gangj ndaej hoengh-hwdhwd. Hoeng, yiengzlwg ceiq siengj raen duzma, de yaek docih duzma gouq de. Hoeng seizneix cix dan mbouj raen duzma daeuj.

Ai, bouxlawz cij dwg baengzyoux ceiq ndei ne? Gyoengq baengzyoux baenzngoenz heux youq henz ndang, ciengzseiz caeuq mwnz guhcaemz, hawj mwnz angqyangz haenx dwg baengzyoux ndei lwi? Caencingq doxndei, mbouj dwg gvaivad roxgangj. Boux baengzyoux ndei wnggai dwg seiz youqgaenj sijndaej ietfwngz bang mwnz haenx ha.

(Ganh Sozywnz/甘说文)

Baez Daih'it Fadndwn

第一次罚站

Daj iq daengz hung, raeuz cungj dwg youq fouzsoq baez daih'it ndaejdaengz gyauyuz caeuq daezsingj, youq fouzsoq baez daih'it menhmenh majhung.

Baez daih'it ndaej byaujyangz, baez daih'it deng bihbingz, baez daih'it youz-raemx……, hoeng ceiq sawj gou nanzlumz dwg baez daih'it deng fadndwn, moix baez siengj hwnj baez ginglig haenx, cungj sawj gou naj nding naj ndat.

Baez haenx, aenvih hwnjdangz gangj-vah, deng lauxsae dingqny lo. Lauxsae baez huj, couh fad gou ndwn youq naj gyangjdaiz, dangseiz gou roxnyinh swheij miz di mbouj miz naj raen vunz, mbouj rox geijlai hojsouh ha, hix mbouj rox baenzlawz ngaiz daengz roengzdangz.

Daengz seizneix gou lij geiq ndaej gig cingcuj, baez ginglig neix sawj gou gamjdaengz gig najmong, sawj gou bienqbaenz boux hagseng souj gijliz, hwnjdangz nyinhcaen dingq gangj he, sawj gou ciemhciemh majhung.

(ngeih nienzgaep Lij Gingjungz)



Daj Seizneix Hainduj

从现在开始

Siengj bae siengj dauq, gou cij fatyienh, gou lij caengz bauqdap gvaq bohmeu gou. Caiq siengjsiengj gyoengqde vih gou guh le gijmaz, aen'uk sikhaek yienh'ok baenz fuk baenz fuk veh daeuj——Mbwn lij caengz rongh, daxmeh couh hwnqdauej guh ngaizcaeux hawj gou; mbwn nit lo, gyoengqde lau gou dwgliengz, soengq buhlaengj daeuj hawj gou; gou fatndat baenzbingh lo, gyoengqde gip dwk lumj duzmoed gwnz fagu ndat nei, daengx ngoenz souj youq henz ndang gou……

Gyoengqde bingzseiz vih gou

causim gangj hix gangj mbouj sat, gou ne, cungj dwg mbouj siengj saek mbat couh ciepsouh gij gyaez gyoengqde, cungj roxnyinh gyoengqde vih gou guh dwg wnggai.

Mwh gou angq, gyoengqde buenx gou riu; mwh gou doeknaij, gyoengqde couh nai gou……

Doenghij saeh iq neix, seizneix daeuj yawj, dwg geijlai hungmbwk ha! Gyoengqde couh lumj aenliengj nei, bang gou dangj fwn dangj ndit; gyoengqde lumj aendapdaeng, bang gou ciuq rongh loh baihnaj; gyoengqde lumj daengngoenz, hawj gou raeuj-



rub……

Gou siengj, daj seizneix hwnj, gou couh aeu ciuhvunz gou daeuj bauqdap gyoengqde, gou rox gij bauqdap gou mbouj gaeuq dingj gij aencingz gyoengqde lumj mbwn nei hung, hoeng gou caenh gij rengz gou guh gou guh ndaej daengz haenx daeuj bauqdap gyoengqde, sawj swheij mbouj najmong, mbouj ienqhoij.

(haj nienzgaep Vangz Cwngyij)

Duzlingz Hag Yiengh

猴子学样

Miz ngoenz ndeu, miz goeng-geq he bae ndawsingz gai mauh, aenvih mbwn hwnq, ndigah goenggeq youq henz gofaex ninz-ndae lo, de loqraen swheij yungh gij cienz de gai mauh ndaej haenx cawx ndaej duz bya hung ndeu.

Goenggeq ndiu lo, raen gij mauh swheij mbouj raen lo, goenggeq ra bae ra dauq, doek-

laeng yawj coh baihgwnz, o! Laxlawz gwnz faex miz gyoengq lingz ndeu dawz gij mauh goenggeq bae lo.

Goenggeq couh cam gyoengq lingz aeu mauh de, mwh goenggeq iet song fwngz heuh: "Boiz mauh gou daeuj!" Hoeng duzlingz hix iet song fwngz heuh: "Boiz mauh gou daeuj!" Goenggeq youh song fwngz gaem gienz gouz duzlingz, duzlingz

hix gaem gienz gouz goenggeq. Goenggeq gip lo, couh duet aenmauh gwnz gyauej gau gyauej naeuz: "Baenzlawz guh ne?" Duzlingz hix duet mauh naeuz: "Baenzlawz guh ne?"

Seizhaenx, goenggeq rox lo, duzlingz dwg hag gij yiengh de, de couh dawz aenmauh vut roengz ndaw swx bae, doeklaeng duzlingz hix vut aenmauh roeng swx bae lo.

Goenggeq bae gai mauh lo, mwh byaij goenggeq doiq duzlingz naeuz: "Duzlingz caiqraen!" Gyoengq lingz hix naeuz: "Goenggeq, caiqraen!"

(fouzmingz)